

❁ An Lúibín ❁

5 Bealtaine 2012

An Ghaeilge agus a scéal

B'fhiú do Ghaeilgeoir ar bith féachaint ar *Scéal na Gaeilge*, leagan greannmhar cliste de stair na teanga ar TG4. Baintear feidhm as cartúin bheoga aite, agus Allan Titley, údar, scoláire agus Corcaíoch líofa, ag déanamh tráchtairachta. Tá dhá eipeasóid ar fáil cheana ag:

<http://www.tg4.ie/en/tg4-player/tg4-player.html?id=1516022521001&title=Sc%C3%A9al+na+Gaeilge>

Is trua nach bhfeicfidh an oiread sin Béarlóirí é, ós beag duine acu a mbeadh eolas cruinn nó leathchruinn féin aige ar stair na teanga, agus bhainfidís sult as an tsraith seo. Féach air agus mol é.



Ruaraidh Mac Thòmais, 1921-2012

Bhí Ruaraidh Mac Thòmais (Derek S. Thomson) ar scoláirí móra Gàidhlig a linne, ach is mó an cháil a bhí air mar fhile. Rugadh é i Steòrnabhagh ar Oileán Leòdhais in Inse Ghall sa bhliain 1921 agus tógadh le Gàidhlig é. (Bhí a athair ina fhile traidisiúnta.) Chuaigh Ruaraidh chun Ollscoil Obar Dheathain, áit a ndearna sé staidéar ar Ghàidhlig agus ar Bhéarla, agus chuaigh sé san Aerfhórsa Ríoga sa Dara Cogadh Domhanda. Síleadh gurbh ábhar oifigigh é de barr a chuid oideachais, ach dhiúltaigh sé don onóir. (Dúirt sé san agallamh, más fíor, go raibh teanga iasachta aige – Béarla – agus go raibh tír iasachta amháin feicthe aige – Sasana.)

Lean sé air i mbun léinn tar éis an chogaidh, agus chríochnaigh sé mar Ollamh le Léann Ceilteach in Ollscoil Ghlaschú. Agus rinne sé rud a raibh fíorthábhacht leis: an iris Ghàidhlig *Gairm* a bhunú sa bhliain 1952. Foilsíodh filíocht agus próis, agus ní raibh aon scríbhneoir nótaílte Gàidhlig nach raibh a shaothar le feiceáil ann. Sa bhliain 1958 rinneadh foilsitheoir leabhar de *Gairm* chomh maith. D'fhoilsigh Mac Thòmais féin dhá leabhar an-tábhachtach: *An Introduction to Gaelic Poetry* agus *The Companion to Gaelic Scotland*.

Thar aon rud eile b'fhile é agus a lán dánta breátha foilsithe aige. Cé gur as muintir thraidisiúnta a fáisceadh é chuaigh sé leis an nua-aoiseachas, ar nós filí eile den ghlúin sin - Iain Mac a' Gobhainn, Somhairle Mac Gill-Eain, Deorsa Mac Iain Deorsa agus Domhnaill Mac Amhlaigh. Mar a deir sé siúd i réamhrá le *Nua-Bhàrdachd Ghàidhlig* (1976): 'Tha iad air fás dá-chultarach agus 'se an suidheachadh sa – fear anbarrach corrach – a tha a' riochdachadh an teannais as a bheil mórán de'n chuid bàrdachd a' tighinn' (*Tá siad ag éirí dáchultúrtha agus is é an scéal seo – ceann thar a bheith corrach – atá ag cumadh an teannais a dtagann mórán dá gcuid filíochta as.*)

Cuimhníonn sé ar an mbuairt agus ar an mbaol a cheiltar faoi screamh an tsaoil, agus baineann sé feidhm as íomhánna an dúlra agus an tseansaoil chun a bhraistint a chur in iúl: am bainte an fhéir, am ceana agus díomá:

Dh'fhág mi beagan ri bhuaib am màireach,
is choisich sinn comhla eadar na ràthan:
thuit thu air speal bha fear eile air fhàgail,
is ghearradh do chneas, is dhiùlt e shlànadh. (*Achadh-Bhuana*)

*D'fhág mé beagán le baint amárach agus shiúlamar le chéile idir na sraitheanna: thit tú ar speal a d'fhág duine eile,
agus gearradh do chneas, agus dhiúltaigh sé slánú.*

Cuimhníonn sé freisin ar an áit ar tógadh é, ach machnamh é a dhéantar i bhfianaise na staire agus an tsaoil eile úd nach féidir leis (agus nach mian leis) a thréigean. Tá draíocht ag baint leis an áit dhúchais, ach draíocht í a thagann chuige trí thaithí eile. Tá na hainmneacha ina liodán binn aige:

Múirneag an toiseach Òg-mhìos,
Is Mèalaiseal is Mòinteach Shuardail... (*Leannan M'Òige*)

Ach ní féidir leis gan machnamh a dhéanamh ar an treascairt a rinne an nua-aoiseachas ar an ndúchas seanfhréamhaithe: an taibhse préachán isteach chun a phobail, ag scaipeadh na gcártaí, ag cur na scéalta agus na n-amhrán ina dtost:

Ach cha do dh'fhàg e falamh sinn:
Thug e òran nuadh dhuinn,
Is sgeulachdan na h-àird an Ear,
Is sprùilleach de dh'fheallsanachd Geneva,
Is sguab e 'n teine á meadhon an làir
's chuir e 'n túrlach loisgeach nar broillichean. (*Am Bodach-Ròcais*)

Ach níor fhág sé folamh sinn: thug sé amhrán nua dúinn agus scéalta an Oirthir, agus blúirí d'fhealsúnacht na Ginéive, agus scuab sé an tine as meán an urláir agus chuir sé tine chnámh loisceanta inár mbrollaigh.



Faillí stáit

Seo Coimisinéir Teanga na hÉireann ag gearán agus an phraiseach ar fud na mias. Tá a thuarascáil déanta aige, agus is léir nach bhfuil rath ar an nGaeilge sa rannóg phoiblí. Níl scéimeanna teanga á mbeartú agus tá sé chomh deacair is a bhí riamh freagra a fháil ó státseirbhíseach in aon teanga seachas i mBéarla. Fiú na rudaí a bhí le déanamh de réir na seanscéimeanna níor cuireadh a bhformhór i bhfeidhm. Níl Ranna Stáit ag tabhairt marcanna bónais as inniúlacht sa Ghaeilge agus sa Bhéarla araon ach do dhaoine a bhain amach na céimeanna deiridh sna comórtais.

Le linn na bliana phléigh Oifig an Choimisinéara Teanga le 734 gearán nua faoina dheacra a bhí sé seirbhísí stáit a fháil trí Ghaeilge. Daoine ó áiteanna lasmuigh den Ghaeltacht (ó Bhaile Átha Cliath go háirithe) is mó a bhí míshásta.

B'fhéidir go ndéanfaí fiosrú ar an scéal. Is deacair a shamhlú faoi láthair go bhfuasclódh sin na fadhbanna, agus is é is dóicéil go raibh na polaiteoirí ag súil le rath nárbh fhéidir a bhaint amach leis an bPlean 20 Bliain.




Cúrsaí na hEorpa

Focal isteach

Is gearr ó fuaireamar scéala ó Phádraig Mac Fhearghusa, eagarthóir *Feasta*, gníomhaí agus file. Bhí sé ag plé shuímh ghréasáin an Aontais Eorpaigh agus na dteangacha a bhfuil le fáil ann. Tugann 40 milliún duine sa mhí cuairt ar na suímh sin, agus sholáthair Pádraig graf (féach thíos) a thaispeánann méid na dteachtairreachtaí a tháinig isteach i míonna Eanáir is Feabhra 2012 (*mt* = Máltais agus *ga* = Gaeilge).

Mar a deir sé, cuid suntais is ea na figiúirí faoin nGaeilge agus faoin Máltais: cúig theachtairacht a tháinig isteach i nGaeilge agus fiche ceann i Máltais sa dá mhí sin. Is amhlaidh a úsáidtear figiúirí mar sin chun dáileadh foirne a shocrú sa Choimisiún.

Tá Pádraig ag iarraidh daoine a spreagadh chun féachaint ar shuímh ghréasáin an Aontais Eorpaigh agus ríomhphost a chur isteach chucu anois is arís, mar gur mór a chabhróidh sin le neartú na Gaeilge sna hinstitiúidí Eorpacha.



Ag fás suas san AE

Scéala ó Coisceim (www.coisceim.ie) faoin Aontas Eorpach agus an tAontas sin i gcrúachás: comórtas úr dar teideal 'GLÚIN 1992.EU' (Generation 1992.eu). Tá an t-eolas á scaipeadh i dhá theanga is fiche, ach níl an Ghaeilge orthu.

Más duine thú den ghlúin a rugadh san AE sa bhliain, táthar ag iarraidh ort físeáin, grianghraif, cartúin, aistí nó aipeanna fóin a chur isteach faoin gciall a bhaineann do ghlúin as margadh aonair an AE. 9 Meán Fómhair an sprioc. Mar a deirtear san fhógra, is é an margadh céanna a chuireann ar chumas daoine taisteal, staidéar, obair, maireachtáil agus siopadóireacht a dhéanamh gan stró in aon tír den Aontas. Sáraíodh na céadta bacainn theicniúil, dhlíthiúil agus mhaorlathach, cuireadh borradh faoin ngeilleagar agus cruthaíodh beagnach dhá mhilliún post nua.

Iarrtar ort aird a thabhairt ar na rudaí a leanas: oideachas agus saoránacht, poist agus fiontraíocht, cultúr agus fóillíocht, tomhaltóirí agus an comhshaol. Breis eolais:

http://generation1992.eu/en/participation/about_competition.

B'fhéidir go ndéarfadh na Gréagaigh faoi láthair gurb é an tairbhe is mó a bhainfidís as an AE post shocair a fháil sa Ghearmáin agus cúl a thabhairt ar an bpraiseach sa bhaile. Tá neart Éireannach ag tabhairt a n-aghaidhe ar an Astráil – níl a ndóthain teangacha acu, is dócha, chun dul sa seans san Eoraip.

An Domhan

Na hAlabhaígh agus an tSiria

Ba é an t-achrann atá ar siúl sa tSiria is túsce a tharraing aird an domhain ar na hAlabhaígh, seict a d'éascair ón ngnáth-Ioslamachas agus a dtugann a stair léargas ar an dílseacht threibheach agus na gréasáin phátrúnachta a bhfuil tábhacht ar leith leo sa Mhéan-Oirthear agus sna réigiúin máguaird. Ní ábhar iontais í an tsuim a chuireann scoláirí éigin nótaíte (Malise Ruthven, mar shampla) iontu.

Níl sna hAlabhaítigh ach 12% de phobal na tíre agus scar siad ó na Siaigh os cionn míle bliain ó shin. Roimh an 20ú haois thugtaí *muintir Nusayr* orthu, ó ba é Ibn Nusayr an fear a bhunaigh iad agus é ina chónaí san Iaráic sa 9ú haois. Tháinig siad le chéile sna sléibhte os cionn Latakia ar an gcósta idir an Tuirc agus an Liobáin (mar atá siad anois) agus shaothraigh creideamh a bhí (más fíor do Ruthven agus dá leithéidí) ina mheascán den Nua-Phlatónachas,¹ den Ghnóisíocht,² den Chríostaíocht, den Ioslamachas agus den Sóróstarachas.³ Ba é Abdullah al-Khasibi (a cailleadh sa bhliain 957) a bpríomhdhiagaí, agus dúirt sé go raibh diacht ag roinnt le hAli, gaol agus cliamhain le Muhamad Fáidh agus duine a dtugann na gnáthShiaigh ómós dó, cé nach n-adhraíonn siad é.

Leithéid a lán Siach a tháinig faoi anáil an Ghnóisíochais, creideann siad go seoltar eolas agus críonnacht trí abhatáir dhiaga. Tháinig na habhatáir sin ar an saol as diaidh a chéile, agus orthu siúd tá Críost, Mahamad Fáidh, Sócráiteas, Plátón, Gailéan agus roinnt maistrí Peirseacha réamh-Ioslamacha.

Tá an rúndacht nó *taqiyya* mar chosaint ag na hAlabhaítigh – an ceart chun a bhfíorchreideamh a cheilt ar an domhan ar eagla na géarleanúna. Tá córas casta ionadachta acu agus abairtí sainsiúla mar chuid de, agus déantar a ndeasghnátha sa bhaile nó i áiteanna uaigneacha. Tá rian soiléir na Críostaíochta ar a gcreideamh – tá tábhacht le tríonóid, tá an príomhdheasghnáth (an *Qurban*) an-chosúil leis an Aifreann, agus fógraítear sa *Quddas* (paidir fhada) gur i Naomh Peadar, bunaitheoir na Críostaíochta, atá an fíor-Ioslamachas le fáil. Ar nós na nDrúsach, creideann na hAlabhaítigh san athchollúchas: téann anamacha drochdhaoine isteach in ainmhithe salacha ar nós muc agus madraí agus téann anamacha na bhfíréan isteach i gcorp níos foirfe. Is féidir, ar ndóigh, a leithéid a mhíniú mar shamhail nó mheafar, mar bhealach chun dul amach ar an bhfírinne.

Neartaigh sé sin go léir an dlúthchomhar treibheach nó teaghlaigh a bhí mar bhunús riamh leis an gcumhacht sa Mheán-Oirthear. Le linn na nOtamánach ní raibh sna hAlabhaítigh ach mionlach achrannach a ruaig na hIosmálaigh ('eiricigh' eile) d'ardáin na Siria. Nuair a shealbhaigh na Francaigh an tSiria tar éis an Chéad Chogadh Domhanda dúirt na hAlabhaítigh leo féin go raibh a ndíonadóirí tagtha, agus fuair a lán acu oiliúint mhíleata sna *Troupes Spéciales du Levant*. Nuair a bhain an tSiria neamhpleáchas amach sa bhliain 1946 ba mhór an tairbhe dóibh an t-eolas míleata. Chuaigh cuid acu san arm agus cuid eile i bpáirtithe tuata. Ba shuaite an tréimhse í, agus tháinig eagla ar na hAlabhaítigh go raibh na Sunnaigh (an dream ba líonmhaire) ag éirí róláidir. De bharr roinnt *coups d'état* tháinig Hafez al-Assad, ofigeach Alabhaíteach, i gcumhacht sa bhliain 1970, agus mac leis, Bashar al-Assad (fear a rinne staidéar i Sasana), atá faoi réim anois.

Dhá thaobh atá ar an scéal seo. Is fada rialtas Assad ag cur lucht freasúra faoi chois gan trócaire, fiú roimh an gcogadh atá anois ann; ach bhí sé go maith riamh chun mionlaigh na tíre a chosaint (na hAlabhaítigh ina measc, ar ndóigh), rud is cúis, mórán, le héagsúlacht iontach na tíre. Ní cinnte go dtiocfadh an t-ilchultúrachas úd slán ó threascairt an rialtais, agus sin é an fáth go bhfuil an oiread sin Críostaithe agus eile ag seasamh le hAssad go fóill, cuma pé anbhuaín a bheadh orthu de dheasca an áir.

Is beag duine a déarfadh faoi láthair gur féidir leis an rialtas teacht slán, agus is dóigh leis an dá thaobh gur comhrac go himirt anama atá ann. Is é an rialtas an dream is míthrócairí, ach tá roinnt rudaí gránna déanta ag an bhfreasúra freisin, agus scata fear fiáin ag teacht thar teorainn isteach, b'fhéidir, chun buille breise a bhualadh ar Assad. Aithníonn na hAlabhaítigh (agus ní dream fuilteach iad go léir) an chontúirt. D'éirigh le muintir Assad réimeas a bhunú a bhí brathadóirí agus spairí fite fuaite ann, agus eagla ar dhaoine an rud a bhí ar a n-intinn a rá. Anois tá rudaí á rá go neamhbhalbh ag an bhfreasúra, ach tá siad scaipthe agus neamhaontaithe. Daoine óga oilte is ea mórán acu, ach níl tancanna ná gunnaí móra acu, agus tá fóraí an rialtais ag plancadh an phobail thall is abhus. Ní mór a rá gur scéal casta é ar a lán slite – tá an-éagsúlacht ag roinnt leis an tír féin, leis an bhfreasúra, le cuspoirí an phobail (agus níl gach duine i gcoinne Assad). Ach tá deireadh de shaghas éigin tagtha.

Le léamh:

Ruthven, Malise (1997). *Islam : A Very Short Introduction*. Oxford University Press.

¹ Deir an Nua-Phlatónachas gurb í buaic na beatha an t-Aon Mhaith, foinse gach ruda, agus gur féidir leis an anam é féin a aontú leis an Aon Mhaith sin trí dhianmhachnamh agus dheai-iompar.

² Deir an Ghnóisíocht go bhfuil Foinse Ilchumhachtach amháin ann ach gur iomaí neach neamhfoirfe atá idir siúd agus sinn féin agus go bhfuil an saol seo lochtach ó nádúr.

³ Deir an Sóróstarachas go bhfuil Cruthaitheoir amháin (Ahura Mazda) ann, neach nach bhfuil aon donas ann. Bíonn an t-Olcas (fórsa ainrialtá ó áit eile) ag iarraidh an Mhaith a scrios.

'Storm over Syria,' Malise Ruthven, *The Australian Financial Review*, 17/6/11.

Allen, Brooke (2011). *The Other Side of the Mirror: An America Travels Through Syria*. Paul Dry.

Mura mian leat *An Lúibín* a fháil, cuir teachtaireacht dá réir chun rianach@optusnet.com.au.

If you do not wish to receive this newsletter, please send an email accordingly to rianach@optusnet.com.au.

Leaganacha simplithe

Ruaraidh Mac Thòmais, 1921-2012

File Gàidhlig agus scoláire mór ba Ruaraidh Mac Thòmais. Rugadh é ar Oileán Leòdhais⁴ in Inse Ghall⁵ sa bhliain 1921 agus tógadh le Gàidhlig é. Bhí a athair ina fhile traidisiúnta. Chuaigh Ruaraidh chun Ollscoil Obar Dheathain,⁶ áit a ndearna sé staidéar ar Ghàidhlig agus Bhéarla, agus chuaigh sé san Aerfhórsa Ríoga sa Dara Cogadh Domhanda. Sileadh gurbh ábhar oifigigh⁷ é de barr a chuid oideachais, ach dhiúltaigh sé don phost. (Dúirt sé san agallamh, más fíor, go raibh teanga iasachta amháin aige – Béarla – agus go raibh tír iasachta amháin feicthe aige – Sasana.)

Lean sé air ag déanamh staidéir tar éis an chogaidh, agus rinneadh⁸ Ollamh le Léann Ceilteach de in Ollscoil Ghlaschú. Bhunaigh sé an iris Ghàidhlig *Gairm* sa bhliain 1952. Thug sin spreagadh mór do scríbhneoirí Gàidhlig. D'fhoilsigh Mac Thòmais féin dhá leabhar an-tábhachtacha: *An Introduction to Gaelic Poetry* agus *The Companion to Gaelic Scotland*.

B'fhile suntasach é agus stíl an-chomhaimseartha⁹ aige. Bhí lé aige¹⁰ riamh lena áit dhúchais agus le nósanna na háite sin, ach bhí sé in ann breith a thabhairt ar an saol sin le súil na haoise nua.

Faillí stáit

Tá tuarascáil déanta ag Coimisinéir Teanga na hÉireann, agus níl sé sásta ar chor ar bith le staid na Gaeilge sa rannóg¹¹ phoiblí. Níl scéimeanna teanga á mbeartú¹² a thuilleadh chun an teanga a chur chun cinn. Fiú na rudaí a bhí le déanamh de réir na seanscéimeanna níor cuireadh a bhformhór¹³ i bhfeidhm.

Anuraidh phléigh¹⁴ Oifig an Choimisinéara Teanga le 734 gearán nua faoi cé chomh deacair is a bhí sé¹⁵ seirbhísi stáit a fháil trí Ghaeilge. Daoine ó áiteanna lasmuigh den Ghaeltacht (ó Bhaile Átha Cliath go háirithe) is mó a rinne gearán.

B'fhéidir go ndéanfaí fiosrú ar an scéal. Is dócha, nuair a rinneadh plean náisiúnta chun an Ghaeilge a chur chun cinn, go raibh na polaiteoirí ag súil le rath nárbh fhéidir a bhaint amach.¹⁶

An Domhan

Tá níos mó suime á cur sna Alabhaítigh (*Alawites* i mBéarla) de bharr an chogaidh chathartha sa tSiria. D'eascair na hAlabhaítigh ón ngnáth-Ioslamachas¹⁷ fadó.

Níl sna hAlabhaítigh ach 12% de phobal na tíre. Scar siad ó na Siaigh¹⁸ os cionn míle bliain ó shin. *Muintir Nusayr* an t-ainm eile atá orthu, ó ba é Ibn Nusayr an fear a bhunaigh iad san Iaráic sa 9ú

⁴ Leòdhas - Lewis

⁵ Inse Ghall – the Hebrides

⁶ Obar Dheathain - Aberdeen

⁷ Ábhar oifigigh – ‘officer material’

⁸ Rinneadh...de - became

⁹ An-chomhaimseartha – very contemporary

¹⁰ Bhí lé aige (le) – he had a partiality (for)

¹¹ Rannóg - sector

¹² Á mbeartú – being devised

¹³ A bhformhór – most of them

¹⁴ Pléigh le – deal with

¹⁵ Cé chomh deacair is a bhí sé – how difficult it was

¹⁶ Nárbh fhéidir a bhaint amach – that it was not possible to achieve

¹⁷ Gnáth-Ioslamachas – conventional Islam

¹⁸ Na Siaigh – the Shiites

haois. Tháinig siad le chéile sna sléibhte ar an gcósta idir an Tuirc agus an Liobáin. D'fhág a lán creideamh nó fealsúnachtaí eile a rian orthu.

Tháinig siad faoi anáil¹⁹ an Ghnóisíochais,²⁰ agus creideann siad gur tháinig abhatáir²¹ ó neamh chun eolas a thabhairt don chine daonna. Orthu sin²² tá Críost, Mahamad Fáidh, Sócráiteas, Plátón, Gailéan agus roinnt maistrí Peirseacha réamh-Ioslamacha.

Tá tábhacht leis an rúndacht i slí bheatha na nAlabhaiteach chun iad féin a chosaint ar an namhaid. Tá rian soiléir na Críostaíochta ar a gcreideamh: mar shampla, tá a bpríomhdheasghnáth²³ (an *Qurban*) an-chosúil leis an Aifreann. Creideann na hAlabhaitigh san athchollúchas.²⁴ téann anamacha drochdhaoine isteach in ainmhithe salacha agus téann anamacha na bhfíréan²⁵ isteach i gcorp níos foirfe. Is féidir, ar ndóigh, é seo a mhíniú mar shamhail nó mheafar.

Nearthaigh sé sin go léir an dlúthchomhar treibheach²⁶ a bhí mar bhunús riamh leis an gcumhacht sa Mheán-Oirthear. Le linn na nOtamánach ní raibh sna hAlabhaitigh ach mionlach achrannach. Nuair a shealbhaigh na Francaigh an tSiria tar éis an Chéad Chogadh Domhanda d'éirigh na hAlabhaitigh mór leo ar mhaithe leo féin. Fuair a lán acu oiliúint mhíleata ó na Francaigh. Nuair a bhain an tSiria neamhpleáchas amach sa bhliain 1946 chuaigh mórán Alabhaiteach san arm. Bhí eagla orthu roimh na Sunnaigh,²⁷ an dream ba mhó sa tír. Tháinig Hafez al-Assad, ofigeach Alabhaiteach, i gcumhacht sa bhliain 1970, agus mac leis, Bashar al-Assad, atá i gcumhacht anois.

Is fada rialtas Assad ag cur lucht freasúra²⁸ faoi chois,²⁹ ach bhí sé go maith riamh chun mionlaigh na tíre a chosaint. Mhéadaigh sé sin éagsúlacht chultúrtha na tíre. B'fhéidir nach dtiocfadh an éagsúlacht sin slán ó³⁰ threascairt an rialtais. Sin é an fáth go bhfuil claonadh ag na mionlaigh seasamh le hAssad.

Is dóigh leis an dá thaobh gur comhrac go himirt anama³¹ atá ann. Is é an rialtas an dream is míthrócairí,³² ach tá rudaí gránna déanta ag an bhfreasúra freisin. Níl gach duine de na hAlabhaitigh tugtha don lámh láidir,³³ ach tá imní orthu.

¹⁹ Tháinig siad faoi anáil – they came under the influence

²⁰ Gnóisíochas - Gnosticism

²¹ Abhatáir - avatars

²² Orthu sin – among those

²³ Príomhdheasghnáth – main ceremony

²⁴ Athchollúchas - reincarnation

²⁵ Anamacha na bhfíréan – the souls of the just

²⁶ Dlúthchomhar treibheach - clannishness

²⁷ Na Sunnaigh – the Sunnis

²⁸ Lucht freasúra – members of the opposition

²⁹ (Cuir) faoi chois - suppress

³⁰ (Tar) slán ó – survive

³¹ Comhrac go himirt anama – fight to the death

³² An dream is míthrócairí – the most merciless group

³³ Tugtha don lámh láidir – given to violence